

七十二家集

夏侯常侍集引

夏侯將種迨其盛也太初玄悟  
騰藉于魏朝孝若綺藻流芬于  
晉世風儀韶秀迭炳國華所謂  
芝草越根澧水踰源者也湛與  
潘安仁並時連璧湛泰始初卽

對策爲郎岳亦早辟司空府以  
泰始中獻籍田賦想其解巾登  
仕亦同塵接裊晉書二人同傳  
而湛爲首乃鍾仲偉詩評稱孝  
若晚進見重安仁此誤也湛文  
視岳稍遜然沈至處正復不近

然則官階微躋退作抵疑殊勝  
潘之乾沒不休年壽早彫遺命  
薄葬又勝潘之并命東市踐季  
倫白首同歸之識也若補亡之  
詩友于之誥天性夙篤內行聿  
修正乃克荷門風頓超儕伍矣

紹和張燮識



夏侯常侍集目錄

卷之一

賦

雷賦

春可樂賦

秋夕哀賦

秋可哀賦

大暑賦

禊賦

梁田賦

夜聽箏賦

鞞舞賦

雀釵賦

缸燈賦

繳彈賦

觀飛鳥賦

玄鳥賦

獵兔賦

愍桐賦

芙蓉賦

石榴賦

宜男花賦

朝華賦

浮萍賦

薺賦

瓜賦

詩



周詩

山路吟

江上泛歌

離親誅

長夜謠

寒苦謠

征邁辭

卷之二

設難

抵疑

序

羊秉序

從祖叔權幼權序

誥

昆弟誥

贊

東方朔畫贊

有序

虞舜贊

左丘明贊

顏子贊

閔子騫贊

莊周贊

管仲贊

鮑叔贊

范蠡贊

魯仲連贊

傳

外祖母憲英傳

附錄

夏侯湛傳

唐太宗

夏侯常侍誅

晉潘岳

遺事

集評

夏侯常侍集卷之一

晉譙國夏侯湛孝若著

明閩漳張燮紹和纂

賦

雷賦

伊朱明之季節兮暑燠赫以盛興扶桑煒以揚  
燎兮雷火曄以南升大明黯其潛曜兮天地鬱  
以同蒸掣丹霆之皓琰兮奮迅雷之崇崇馳壯  
首於天上兮激駁響於地中徒觀其霰電之所

種鑿火石之所燒爍雲雨之所澆沃流潦之所  
淹濯當衝則摧破遇披則織溺山林爲之崩盪  
群生爲之震辟是以大聖變於烈風小雅蕭於  
天高嗟乾坤之神祇兮信靈化之誕昭故先王  
之制刑擬雷霆於征伐恢文德以經化兮耀武  
義以崇烈苟不合於大象兮焉濟道以成哲

春可樂賦

春可樂兮樂東作之良時嘉新川之啓萊悅中  
疇之發苗桑冉冉以奮條麥遂遂以揚秀澤苗  
翳渚原并耀阜春可樂兮樂崇陸之可娛登夷  
岡以迴眺超矯駕乎山隅綴雜華以爲蓋集繁  
綖以飾裳散風衣之馥氣納戢懷之潛芳鶯交  
交以弄音翠翾翾以輕翔招君子以偕樂携淑  
人以微行

秋夕哀賦

秋夕兮遙長哀心兮求傷結帷兮中宇踈履兮  
閑房聽蟋蟀之潛鳴覩遊鴈之雲翔尋脩廡之  
飛檐覽明月之流光木蕭蕭以被風階縞縞以  
受霜玉機兮環轉四運兮驟遷銜恤兮迄今忽  
將兮涉年日往兮哀深歲暮兮思繁



秋可哀賦

秋可哀兮哀秋日之蕭條火迴景以西流天旣  
清而氣高壤含素霜山結玄霄月延路以增夜  
日遷行以收暉屏締綌於篋笥納綸縞以授衣  
秋可哀兮哀新物之陳蕪綢篠朔以歛締密葉  
撼以隕疎鴈擢翼於太清燕蟠形乎榛墟秋可  
哀兮哀良夜之遙長月翳翳以隱雲時籠籠以  
投光映前軒之疎幌炤後帷之閑房拊輕衾而  
不寐臨虛檻而褰裳感時邁以興思情愴愴以

含傷

# 大暑賦

惟青春之謝兮接朱明之季月何太陽之赫曦  
乃鬱陶以興熱於是大呂統律祝融紀節蒸澤  
外熙太陰內閉若乃三伏相仍狙暑彤彤上無  
纖雲下無微風扶桑輶其增熾天氣曄其南升  
爾乃土墳墜坼谷枯川竭寒泉潛沸永井騰沫  
洪液蒸於單簟兮珠汗霑乎絺葛溫風翕其至  
今若灑湯於玉質沃新水以達夕振輕箑以終  
日

楔賦

羨暮春之嘉辰美靈氣之和柔結方軌於泰路  
敷令節而宣遊爾乃  
繁纓微雲乘軒清風卷旌飛輪焱起良馬電驚  
車駕鱗萃男女霧會服煥羅縠翠翳連蓋縈香  
九於素襟結九齡乎時外粲爛虺韓焜曄發越  
若乎朝春挺葩夕霞抱月爾乃臨清流背綠柯  
雲幕高接丹組四羅

梁田賦

嬉於夷寧之廣陸步于大野之長京察田疇之  
疆畔觀遊雉之逸形

夜聽箏賦

越鳥戀乎南枝胡馬懷夫朔風惟人情之有思  
乃否滯而發中南閭兮拊掌北闔兮鳴箏鳴箏  
兮協節分唱兮相和相和兮諧慘激暢兮清哀  
奏烽燧之初驚展從繇之歎乖伸葉兮更纏遷  
調兮故顏披涼州之妙操掄飛龍之奇引垂幽  
蘭之游響來楚妃之絕歎放鵲鷄之弄音散白  
雪之清變

鞞舞賦

專奇巧於樂府兮苞殊妙乎伶人匪繁手之末  
流兮乃皇世之所珍在廟則格祖考兮在郊則  
降天神納和氣於兩儀兮通克諧乎君臣協至  
美於九成兮等太上乎曆文

雀釵賦

覽嘉藝之機巧特精思於雀釵收泉珍於八極  
納瓌異以表奇布太陽而擬法妙團團而應規  
於是妍姿英妙之徒相與競嬖飛龍竝脩勑埋  
桂襟整服飾黛玄眉之琰琰收紅顏而發色流  
盼閑步輕袂翼翼侍炫豔以相邈常逍遙而侍  
側昔先王興道立教崇坤讓以致賢不留志於  
華好



缸燈賦

殊珍寶器奇像妙工取光藏煙致巧金銅融冶  
甄流陶形定容爾乃隱以金翳疏以華籠融素  
膏於回槃發朱曜於綺窓宣耀蘭堂騰明廣宇  
熠煜爚于茵筵煥炤炳晰乎屏組

繳彈賦

張弱弓理繁繳望大群以送九審追放而必獲

觀飛鳥賦

見逸遊之高鳥邈颺颺而殊逝摧華毛以迅鷺  
迴勁翮以揚勞披六翮之聯翩振輕體之迢遞  
遂乃矜形遼廓馮虛安翔翩翩裴徊上下頡頏  
動素羽之習習亂白質於日光玩流氣以差池  
弄長風以抑揚攝雙翅以高舉舒脩頸以儼佯  
目悅妙勢心嘉羽儀愛惠音之嚶嚶美弱翰之  
參差暫高凌於景外又抑身乎雲岵乍來乍往  
若懸若垂象流星之離天似圓物之墜危何斯

遊之自得諒逸豫之可希苟臨川而羨魚亦觀  
翔而樂飛

玄鳥賦

觀羽族之群類美玄鳥之翔集順陰陽以出處  
隨寒暑而遊蜚擢翾翾之麗容揮連翩之玄翼  
挺參差之脩尾發緇素之鮮色及至大火西景  
商風吹衣遂匿形於深穴歛六翮而不飛含靜  
泊以克肌喻至和之精粹澹恬心以去欲故保  
生而不匱虞衆物之爲害獨棄林而憑人不驚  
畏以自疏永歸馴而附親有受祥而皇祗故遺  
卵而生殷惟帝皇之嘉美置高祿以表神類鸞

皇之知德象君子之安仁爾乃銜泥構巢營居  
傳桷積一喙而不已終累泥而成屋拾柔草以  
自藉採懦毛以爲蓐吐清惠之冷音永吟鳴而  
自足

獵兔賦

爾乃乘露箱御良馬盾戈接於廣漠弓矢連於  
曠野端眺蒿萊摘野榛穢落日攢慨傍窺蓊蒼  
視兔之所隱乃精望而審發弦絕箭激驚伏  
企斃搜陵危險覓歷岡阜留罾挂於重林踈置  
結於通藪密驚視於草間暫見之於蒙茸擬以  
銳爰規以良弓覩毫末而放鏃乃殪之於窟中  
或紛歛赫以驚驚影跳竦而揚白擢輕足之竽  
竿振遊形之躍躍弓不暇彎且不及幕爾乃鷹

鷗翻以飄揚勁翼謾而下側馬釋控以長騁鬱  
騰空而陵厲翕習於廻阻之間繚繞於山澤之  
際盤紆遊田其樂泄泄心旣倦今日遷命與駕  
今將還息徒蘭圃秣驥華田目送歸鴻手揮五  
絃優哉游哉聊以末年



愍桐賦

有南國之陋寢植嘉桐乎前庭闢洪根以誕茂  
豐脩幹以繁生納谷風以䟽葉含春雨以濯莖  
濯莖天天布葉藹藹蔚童童以重茂蔭蒙接而  
相蓋蔽陰澹之南表覆陽阿之北外於是詰朝  
之暇步趾前廡春以遊目夏以清暑昔詩人之  
所稱美厥生之攸竒植匪崗其不滋識非條其  
不儀

芙蓉賦

臨清池以遊覽觀芙蓉之麗華潛靈藕於玄泉  
擢脩莖乎清波煥然蔭沼灼爾星羅若乃廻紫  
外散菡萏內離伯出豔發葉恢花披綠房翠帶  
紫飾紅敷黃螺圓出垂絛散舒纓以金牙點以  
素珠固陂池之麗觀尊終世之特殊爾乃採淳  
葩摘圓質析碧皮食素實味甘滋而清美同嘉  
異乎橙橘叅嘉果以作珍長克御乎口實

石榴賦

覽華圃之嘉樹兮羨石榴之奇生  
滋玄根於夷壤兮擢繁榦於蘭庭  
霑靈液之粹色兮含渥霧以深榮  
若乃時雨新稀微風扇物藹萋萋以鮮  
茂兮紛扶輿以蓊鬱枝摻稔以環柔兮  
葉鱗次以周密纖條參差以窈窕兮洪  
柯流離以相拂於是乎青陽之末朱明  
之初翕微煥以摘采兮的窟璨以揚敷  
接翠萼於綠蒂兮冒紅牙以丹鬚  
葩然含綻璫爾散珠若乃叢純始褻  
聚葩方

離潛暉婉豔綠采未披照灼攢列熒熒玄垂雪  
醒解銷怡神實氣冠百品以奇仰邁衆果而特  
貴

宜男花賦

淑大邦之奇草兮應則百之休祥稟至貞之靈  
氣兮顯嘉名以自彰冠衆卉之挺生兮承木德  
於少陽體柔性剛蕙潔蘭芳結纖根以立本兮  
靈渥液於青雲順陰陽於滋茂兮笑含章之有  
文遠而望之若丹霞照青天近而觀之若芙蓉  
鑒綠泉萋萋翠葉灼灼朱華曄若珠玉之樹煥  
若景宿之羅克后妃之盛飾兮登紫微之內庭  
回日月之暉光兮隨天運以盈虛

朝華賦

咨神樹之脩異寔積陽之純精  
蜿潛根以誕節據川壤以擢莖  
皎日升而朝華玄景逝而夕零  
逮明晨而繁沸若靜夜之衆星  
長莖攢起柔條列布濯靈柯於  
時雨滋逸采於豐露灼煌煌以  
煒煒獨崇朝而達暮於是其樹  
蒼蒼纖枝翩翩潏光玉朗綠葉  
翠鮮

浮萍賦

步長渠以遊目兮覽隨波之微草紛漂澈以澄  
茂兮羗孤生於靈沼因纖根以自滋兮乃逸蕩  
乎波表散圓葉以舒形兮發翠綠以含縹蔭脩  
魚之華鱗兮翳蘭池之清潦旣淡澹以順流兮  
又離容以隨風有纏薄於崖側兮或迴滯乎湍  
中紛上下其靡常兮漂徃來其無窮仰熙陽曜  
俯憑綠水渟不安處行無定軌流息則寧濤擾  
則動浮輕善移勢危易盪似孤臣之介立隨排

擠之所徃內一志以奉朝兮外結心以絕黨澤  
出水而立枯兮士失據而身在覩斯草而慷慨  
兮固知直道之難爽



薺賦

寒冬之日余登乎城跬步乎北園觀衆草之萎悴覽林果之零殘悲纖條之槁摧慙枯葉之飄殫見芳薺之時生被畦疇而獨繁鑽重氷而挺茂蒙嚴霜以發鮮含盛陽而弗萌在太陰而斯育永安性於猛寒羌無寧乎煖燠齊精氣於款冬均貞固乎松竹

瓜賦

入菓林造瓜田摘虎掌拾黃班落蒂離母漬於  
清泉

詩

周詩

敘曰周詩者南垓白華華黍田庚崇丘由儀  
六篇有其義而亡其辭湛續其亡故云周詩  
也

旣殷斯虔仰說洪恩夕定晨省奉朝侍昏宵中  
告還雞鳴在門孳孳恭誨夙夜是敦

山路吟

夙駕兮待明陟山路兮遐征冒晨朝兮入大谷

道逶迤兮嵐氣清攬轡兮抑馬踟躕兮曠野曠  
野疆兮遼落崇岳兮鬼壘丘陵兮連離卉木兮  
交錯淥水兮長流驚濤兮拂石

江上泛歌

悠悠兮遠征倏倏兮暨南荆南荆兮臨長江臨  
長江兮討不庭江水兮浩浩長流兮萬里洪浪  
兮雲轉陽侯兮奔起驚翼兮垂天鯨魚兮岳峙  
縈蕪紛紛被臯陸脩竹鬱兮翳崖趾望江之南  
兮遨目桂林桂枝蓊鬱兮鵠雞揚音凌波兮願

濟舟楫不具兮江水深沈嗟迴盼於北夏何歸  
軫之難尋

離親詠

剖符兮南荆辭親兮遐征發軔兮皇京夕臻兮  
泉亭撫首兮內顧按轡兮安步仰戀兮後塗俯  
歎兮前路旣感物以求思兮且歸身乎懷抱苟  
違親以從利兮匪曾閔之攸寶視微榮之瑣瑣  
兮知吾志之愈小獨申愧於一心兮慙報德之  
彌少

長夜謠

日暮兮初晴天灼灼兮遐清披雲兮歸山垂景  
兮照庭列宿兮皎皎星稀兮月明亭檐隅以逍  
遙兮盼太虛以仰觀望閭闔之昭晰兮麗紫微  
之暉煥

寒苦謠

惟立冬之初夜天慘慄以降寒霜皚皚以被庭  
水漉瀕於井幹草撼撼以疏葉木蕭蕭以零殘  
松隕葉於翠條竹權柯於綠竿

征邁辭

上伊闕兮臨川  
拊駿馬兮授鞍  
中衢兮截歎歛  
鞚兮盤桓

夏侯常侍集卷之二

晉譙國夏侯湛孝若著

明閩漳張燮紹和纂

設難

抵疑

當路子有疑夏侯湛者而謂之曰吾聞有其才而不遇者時也有其時而不遇者命也吾子童幼而岐嶷弱冠而著德少而流聲長而垂名拔萃始立而登宰相之朝揮翼初儀而受卿尹之



舉盪典籍之華談先王之言入閭闔躡丹墀樂  
雕管吐洪輝千當世之務觸人主之威有效矣  
而官不過散郎舉不過賢良鳳樓五朞龍蟠六  
年英耀禿落羽儀摧殘而獨離容藝文蕩駘儒  
林志不輟著述之業口不釋雅頌之音徒費精  
而耗力勞神而苦心此術亦已薄矣而終莫之  
辯宜吾子之陸沈也且以言乎才則吾子優矣  
以言乎時則予之所與二三公者義則骨肉之  
固交則明道之觀也富於德貴於官其所發明

雖叩牛操築之客傭賃抱關之隸負俗懷譏之士猶將登爲大夫顯爲卿尹於何有寶咳唾之音愛錙銖之力向若垂一鱗回一翼令吾子攀其飛騰之勢挂其羽翼之末猶奮迅於雲霄之際騰驤於四極之外今乃金口玉音漠然沉默使吾子栖遲窮巷守此困極心有窮志貌有饑色咨江河之流不以濯舟船之畔惜東壁之光不以寓貧婦之目抑亦二三公之蔽賢也寔吾子之拙惑也嗟侯子曰噫湛也幸有過人必知

之矣吾子所以褒飾之大矣斟酌之喻非小醜之所堪也然過承古人之誨抑因子大夫之忝在敝室敢布其腹心豈能隱几以覽其槃乎客曰敢祇以聽夏侯子曰吾聞先大夫孔聖之言德之不脩學之不講聞義不能徙不善不能改是吾憂也四德具而名位不至者非吾任也是以君子求諸已小人求諸人僕也承門戶之業受過庭之訓是以得接冠帶之末克乎士大夫之列頗闕六經之文覽百家之學弱年而入公

朝蒙蔽而當顯舉進不能拔群出萃却不能抗  
排當世志則乍顯乍昧文則乍幽乍蔚知之者  
則謂之欲逍遙以養生不知之者則謂之欲遑  
遑以求達此皆未是僕之所置也僕又聞世有  
道則士無所執其節黜陟明則下不在量其力  
是以當舉而不辭入朝而酬問僕東野之鄙人  
頑直之陋生也不識當世之便不達朝廷之情  
不能倚靡容悅出入崎傾逐巧點妍嘔喁辯佞  
隨羣班之次伏簡墨之後當此之時若失水之

魚喪家之狗行不勝衣言不出口安能干當世  
之務觸人主之威適足以露狂簡而增塵垢縱  
使心有至言言有偏直此委巷之誠非朝廷之  
欲也今天子以茂德臨天下以八方六合爲四  
境海內無虞萬國玄靜九夷之從王化猶洪聲  
之收清響黎苗之樂函夏若遊形之招惠景鄉  
曲之徒一介之士曾諷急就習甲子者皆奮筆  
揚文議制論道出草茅起林藪御青瑣入金墉  
者無日不有克三臺之寺盈中書之閣有司不

能竟其文當年不能編其籍此執政之所厭聞  
也若乃群公百辟卿士常伯被朱佩紫耀金帶  
白坐而論道者又克路盈寢黃輦玉階之內飽  
其炙牘矣若僕之言皆糞土之說消磨灰爛垢  
辱招穢適可克衛士之爨盈掃除之器譬猶投  
盈寸之膠而欲使江海易色燒一羽之毛而欲  
令大鑪增勢若燎原之煙彌天之雲噓之不益  
其熱噉之不減其氣今子見僕入朝暫對便欲  
坐望高位吐言數百便謂陵嶒一世何吾子之

失評也僕固脂車以須放秣馬以待却反耕於  
枳落歸志乎渦瀨從容乎農夫優游乎卒歲矣  
古者天子畫土以封群后群后受國以臨其邦  
懸大賞以樂其成列九伐以討其違興衰相形  
安危相傾故在位者以求賢爲務受任者以進  
才爲急今也則九州爲一家萬國爲百郡政有  
常道法有恒訓因循而禮樂自定揖讓而天下  
大順夫道學之貴游閭閻之搢紳皆高門之子  
世臣之胤弘風長譽推成而進悠悠者皆天下

之彥也諷詰訓傳詩書講儒墨說玄虛僕皆不  
如也二三公之簡僕於凡庸之肆顯僕於細猥  
之中則爲功也重矣時而清談則爲親也周矣  
且古之君子不知士則不明不安是以居逸而  
思危對食而有乾今也則否居位者以善身爲  
靜以寡交爲慎以弱斷爲重以怯言爲信不知  
士者無公誹不得士者不私愧彼在位者皆稷  
契咎益伊呂周召之倫叔豹仲熊之儔稽古則  
踰黃唐經緯則越虞夏蔑昆吾之功嗤桓文之



勲抵秘管仲蹉跎晏嬰其遠則欲升鼎湖近則  
欲超太平方將保重齋神獨善其身玄白冲虛  
乞爾養直雖力挾太山將不舉一羽揚波萬里  
將不濯一鱗咳唾成珠玉揮袂出風雲豈肯蹴  
躡鄙事取才進人此又吾子之失言子獨不聞  
夫神人乎噲風飲露不食五穀登太清遊山嶽  
靡芝草弄白玉不因而獨備無假而自足不與  
人路同嗜欲不與世務齊榮辱故能入無窮之  
門享不死之年以此言之何待進賢客曰聖人

有言曰邦有道貧且賤焉耻也今子值有道之  
世當太平之會不攘袂奮氣發謀出奇使鳴鶴  
受和好爵見縻抑乃沈身郎署約志勤卑不亦  
羸哉且伊尹之干成湯寧戚之迓桓公或投已  
鼎俎或庸身飯牛明廢興之機歌白水之流德  
入殷王義感齊侯故伊尹起庖厨而登阿衡寧  
戚出車下而階大夫外無微介內無請謁矯身  
擢手徑躡名位吾子亦何不慕賢以自厲希古  
以慷慨乎夏侯子曰嗚呼是何言歟富與貴是

人之所欲非僕之所惡也夫干將之劍陸斷狗  
馬水截蛟龍而鉛刀不能入泥騏驎驪駒之乘  
一日而致千里而駑蹇不能邁畝百鍊之鑑別  
鬚眉之數而壁土不見泰山鴻鵠一舉橫四海  
之區出青雲之外而尺鷃不陵桑榆此利鈍之  
較優劣之決也夫欲進其身者不過千萬乘而  
僕已上朝堂荅世問不過顯所知而僕已竭心  
思盡才學意無雅正可準論無片言可採是以  
頓於鄙劣而莫之能起也以此言之僕何爲其

不自衒哉子不嫌僕德之不劬而疑其位之不  
到是猶反鏡而索照登木而下釣僕未以此爲  
不肖也若乃伊尹負鼎以干湯呂尚隱遊以徼  
文傳說操築以寤主甯戚擊角以要君此非僕  
所能也莊周駘蕩以放言君平賣卜以自賢接  
輿陽狂以蔽身梅福棄家以求仙又非僕之所  
安也若乃季札抗節於延陵揚雄覃思於太玄  
伯玉和柔於仕懷柳惠三緼於士官僕雖不敏  
竊頗彷彿其清塵

# 序

## 羊秉序

羊秉爲撫軍參軍少亡有令譽夏侯孝若爲之敘極相讚悼羊權爲黃門侍郎侍簡文坐帝問曰夏侯湛作羊秉敘絕可想是卿何物

秉字長達太山平陽人漢南陽太守續曾孫大父魏郡府君卽車騎掾元子也府君夫人鄭氏無子乃養秉齠齔而佳小心敬慎十歲而鄭夫人薨秉思容盡哀俄而公府掾及夫人並卒秉群從父率禮相承人不聞其親雖離如也仕參

撫軍將軍事將奮千里之足揮冲天之翼惜乎  
春秋三十有二而卒昔罕虎死子產以爲無與  
爲善自夫子之沒有子產之歎矣亡後有子男  
又不育是何行善而禍繁也豈非司馬生之所  
惑歟

從祖叔權幼權序

稱字叔權自孺子而好令聚童兒爲之渠帥戲  
必爲軍旅戰陳之事有違者輒嚴以鞭捶衆莫  
敢逆淵陰奇之使讀項羽傳及兵書不肯曰能  
則自爲耳安能學人年十六淵與之田見奔虎  
稱驅馬逐之禁之不可一箭而倒名聞太祖太  
祖把其手喜曰我得汝矣與文帝爲布衣之交  
每讌會氣陵一坐辯士不能屈世之高名者多  
從之游年十八卒第榮字幼權幼聰惠七歲能

屬文誦書日千言經日輒識之文帝聞而請焉  
賓客百餘人人一奏刺悉書其鄉邑名氏世所  
謂爵里刺也客示之一寓目使之遍談不謬一  
人帝深奇之漢中之敗榮年十三左右挺之走  
不肯曰君親在難焉所逃死乃奮劍而戰遂沒  
陣



誥

昆弟誥

惟正月才生魄湛若曰咨爾昆弟淳琬琰謨總  
瞻古人有言孝乎惟孝友于兄弟死喪之戚兄  
弟孔懷又曰周之有至德也莫如兄弟於戲古  
之載于訓籍傳于詩書者厥乃不思不可不行  
爾其專乃心一乃聽砥礪乃性以聽我之格言  
淳等拜手稽首湛若曰嗚呼惟我皇乃祖滕公  
肇釐厥德厥功以左右漢祖弘濟于嗣君用垂

祚于後世世增敷前軌濟其好行美德明允相  
繼冠冕胥及以逮于皇曾祖愍侯宣亮魏祖用  
康又厥世遂啓土宇以大綜厥勲于家我皇祖  
穆侯崇厥基以允釐顯志用恢闡我令業維我  
后府君侯祇服哲命欽明文思以熙柔我家道  
丕隆我先緒欽若稽古訓用敷訓典籍乃綜其  
微言嗚呼自三墳五典八索九丘圖緯六藝及  
百家衆流罔不探賸索隱鉤深致遠洪範九疇  
彝倫攸敘乃命世立言越用繼尼父之大業斯

文在茲且九齡而我王母薛姬登遐我后孝思  
罔極惟以奉于穆侯之繼室蔡姬以致其子道  
蔡姬登遐隘于穆侯之命厥禮乃不得成用不  
衽于祖始惟乃用黜其求慕厥乃以疾辭位用  
遜于厥家布衣席橐以終于三載厥乃古訓無  
文我后丕孝其心用假于厥制以穆于世父使  
君侯惟伯后聰明睿智奕世載德用慈友于我  
后我惟烝烝是虔罔不克承厥誨用增茂我敦  
篤以播休美于一世厥乃可不遵惟我用夙夜

匪懈日鑽其道而仰之彌高鑽之彌堅我用欲  
罷不敢豈惟予躬是懼寔令跡是奉厥乃晝分  
而食夜分而寢豈唯令跡是畏寔爾猶是儀鳴  
呼予其敬哉俞予聞之周之有至德有婦人焉  
我母氏羊姬宣慈愷悌明粹篤誠以撫訓群子  
厥乃我亂齒則受厥教于書學未遑惟寧敦詩  
書禮樂孳孳弗倦我有識惟與汝服厥誨惟仁  
義惟孝友是尚憂深思遠祇以防于微翳義形  
於色厚愛平恕以濟其寬裕用緝和我七子訓

迺我五妹惟我兄弟姊妹束脩慎行用不辱于  
冠帶寔母氏是憑予其爲政最爾惟母氏仁之  
不行是戚予其望色思寬獄之不情教之不泰  
是訓予其納戒思詳嗚呼惟母氏信著于不言  
行感于神明若夫恭事于蔡姬敦穆于九族乃  
高于古之人古之人厥乃千里承師矧我惟父  
惟母世德之餘烈服膺之弗可及景仰之弗可  
階汝其念哉俾群弟天祚于我家俾爾咸休明  
是履淳英哉文明柔順琬乃沉毅篤固惟璫厥

清粹平理謨茂哉雋哲寅亮總其弘肅簡雅瞻  
乃純鑠惠和惟我蒙蔽極否于義訓嗟爾六弟  
汝其滋義洗心以補予之尤予乃亦不敢忘汝  
之闕嗚呼小子瞻汝其見予之長於仁未見予  
之長於義也瞻曰俞以如何湛若曰我之肇于  
總角以逮于弱冠暨于今之二毛受學于先載  
納誨于嚴父慈母予其敬怠于厥身而匡予之  
織介翼予之小疵使予有過未嘗不知予知之  
迪改惟冲子是賴予親于心愛于中敬于貌厥

乃口無擇言柔惠且直廉而不削實而不厲厥  
其成予哉用集我父母之訓庶明厲翼邇可遠  
在茲瞻拜手稽首曰俞湛曰都在脩身在愛人  
瞻曰吁惟聖其難之湛曰都厥不行惟難厥行  
惟易淳曰俞明而昧崇而卑冲而恒顯而賢同  
而疑厲而柔和而矜湛曰俞乃言厥有道淳曰  
俞祇服訓湛曰來琬汝亦昌言琬曰俞身不及  
於人不敢墮於勤厥故惟新湛曰俞瑄亦昌言  
瑄曰俞滋敬于已不茲敬于已惟敬乃恃無忘

有耻湛曰俞謨亦昌言謨曰俞無忘於不可不  
虞形貌以心訪心於虞湛曰俞總亦昌言總曰  
俞若憂厥憂以休湛曰俞瞻亦昌言瞻曰俞復  
外惟內取諸內不忘諸外湛曰俞休哉淳等拜  
手稽首湛亦拜手稽首乃歌曰明德復哉家道  
休哉世祚悠哉百祿周哉又作歌曰訊德恭哉  
訓翼從哉內外康哉皆拜曰欽哉



贊

東方朔畫贊

有序

大夫諱朔字曼倩平原厭次人也魏建安中分  
厭次以爲樂陵郡故又爲郡人焉事漢武帝漢  
書具載其事先生瓌瑋博達思周變通以爲濁  
世不可以富貴也故薄游以取位苟出不可以  
直道也故頽頽以傲世傲世不可以垂訓也故  
正諫以明節明節不可以久安也故詼諧以取  
容潔其道而穢其迹清其質而濁其文弛張而

不爲邪進退而不離群若乃遠心曠度膽智宏  
材倜儻博物觸類多能合變以明筭幽贊以知  
來自三墳五典八索九丘陰陽圖緯之學百家  
衆流之論周給敏捷之辯支離覆逆之數經脉  
藥石之藝射御書計之術乃研精而究其理不  
習而盡其功經日而諷於口過耳而聞於心夫  
其明濟開豁包含弘大陵轢卿相嘲哂豪傑籠  
罩靡前貽藉貴勢出不休顯賤不憂戚戲萬乘  
若寮友視儔列如草芥雄節邁倫高氣蓋世可

謂拔乎其萃游方之外者已譚者又以先生嘘  
吸冲和吐故納新蟬蛻龍變棄俗登僊神交造  
化靈爲星辰此又奇怪惚恍不可備論者也大  
人來守此國僕自京都言歸定省覩先生之縣  
邑想先生之高風徘徊路寢見先生之遺像逍  
遙城郭觀先生之祠宇慨然有懷乃作頌焉其  
辭曰

矯矯先生肥遯居貞退不終否進亦避榮臨世  
濯足希古振纓濯而無滓旣濁能清無滓伊何

高明克柔能清伊何視污若浮樂在必行處淪  
罔憂跨世陵時遠蹈獨游瞻望往代爰想遐蹤  
邈邈先生其道猶龍染迹朝隱和而不同栖遲  
下位聊以從容我來自東言適茲邑敬問墟墳  
企佇原隰墟墓徒存精靈永戢民思其軌祠宇  
斯立徘徊寺寢遺像在圖周旋祠宇庭序荒蕪  
榱棟傾落草萊弗除蕭蕭先生豈焉是居是居  
弗形悠悠我情昔在有德罔不遺靈天秩有禮  
神監孔明彷彿風塵用垂頌聲

虞夏贊

有虞情情揖讓鼓琴垂拱臨民詠彼南音世澄  
道玄天下混心民思王度如玉如金

左丘明贊

世亂讒勝君子道憂丘明達聖致志春秋微微  
之難旁行不流庶幾斯文希志訓猷

顏子贊

知微知微體深研機明象介石量同聖師振耀  
罔滯在言靡遺仰諸惟高瞻之攸希

閔子騫贊

聖既擬天賢亦希聖蒸蒸子騫立體忠正于祿  
辭親事親盡敬勉心景迹擢辭流詠

莊周贊

道遠莊周騰世獨遊遯時放言齊物絕尤垂釣  
一壑取戒犧牛望風寄心託志清流

管仲贊

堂堂管生忘存興仁仁道在已唯患無身包辱  
遠害思濟彝倫心寄鮑子動成生民

鮑叔贊

鮑叔情情式昭德音綢繆敬叔二人同心厥芳  
猶蘭其堅如金遙遙景迹君子攸欽

范蠡贊

悠悠范子求仁在已進報危國退弘妙理身與  
勲偕名與身否逸群遠遊永齊終始

魯仲連贊

峩峩先生有邈其節流仁憂亂抗道自絜隨事  
抑揚與時開闢在幽能泰處悶惟悅

傳

外祖母憲英傳

憲英聰明有才鑒初文帝與陳思王爭爲太子  
旣而文帝得立抱毗頸而喜曰辛君知我喜不  
毗以告憲英憲英歎曰太子代君主宗廟社稷  
者也代君不可以不戚主國不可以不懼宜戚  
而喜何以能久魏其不昌乎弟敞爲大將軍曹  
爽參軍司馬宣王將誅爽因爽出閉城門大將  
軍司馬魯芝之將爽府兵犯門斬關出城門赴爽



來呼敝俱去敝懼問憲英曰天子在外太傅閉城門人云將不利國家於事可得爾乎憲英曰天下有不可知然以吾度之太傅殆不得不爾明皇帝臨崩把太傅臂以後事付之此言猶在朝士之耳且曹爽與太傅俱受寄託之任而獨專權勢行以驕奢於王室不忠於人道不直此舉不過以誅曹爽耳敝曰然則事就乎憲英曰得無殆就爽之才非太傅之偶也敝曰然則敝可以無出乎憲英曰安可以不出職守人之大

義也凡人在難猶或恤之爲人執鞭而棄其事  
不祥不可也且爲人死爲人任親昵之職也從  
衆而已敝遂出宣王果誅爽事定之後敝歎曰  
吾不謀於姊幾不獲於義逮鍾會爲鎮西將軍  
憲英謂從子羊祜曰鍾士季何故西出祜曰將  
爲滅蜀也憲英曰曾在事縱恣非持久處下之  
道吾畏其有他志也祜曰季毋勿多言其後會  
請子琇爲參軍憲英憂曰他日見鍾會之出吾  
爲國憂之矣今日難至吾家此國之大事必不

得止也琇固請司馬文王文王不聽憲英語琇  
曰行矣戒之古之君子入則致孝於親出則致  
節於國在職思其所司在義思其所立不遺父  
母憂患而已軍旅之間可以濟者其惟仁恕乎  
汝其慎之琇竟以全身憲英年至七十有九泰  
始五年卒

附錄

夏侯湛傳

唐太宗

夏侯湛字孝若譙國譙人也祖威魏兖州刺史父莊淮南太守湛幼有盛才文章宏富善構新詞而美容觀與潘岳友善每行止同輿接茵京都謂之連璧少爲太尉掾泰始中舉賢良對策中第拜郎中累年不調乃作抵疑以自廣後選補太子舍人轉尚書郎出爲野王令以卹隱爲急而緩於公調政清務閑優游多暇乃作昆弟

誥居邑累年朝野多歎其屈除中書侍郎出補  
南陽相遷太子僕未就命而武帝崩惠帝卽位  
以爲散騎常侍元康初卒年四十九著論三十  
餘篇別爲一家之言初湛作周詩成以示潘岳  
岳曰此文非徒溫雅乃別見孝悌之性岳因此  
遂作家風詩湛族爲盛門性頗豪侈侯服玉食  
窮滋極珍及將沒遺命小棺薄歛不脩封樹論  
者謂湛雖生不砥礪名節死則儉約令終深達  
存亡之理

史臣曰孝若揆蔚春華時標麗藻覩其抵疑詮  
理本窮通於自天作誥敷文沅英聲於孝悌旨  
深致遠殊有大雅之風烈焉

贊曰湛稱弄翰縉彩彫煥才高位卑往哲攸嘆

夏侯常侍誄

晉潘岳

夏侯湛字孝若譙國譙人也少知名弱冠辟太尉府掾賢良方正徵爲太子舍人尚書郎野王令中書郎南陽相家艱乞還頃之選爲太子僕未就命而世祖崩天子以爲散騎常侍從班列也春秋四十有九元康元年夏五月壬辰寢疾卒於延熹里第嗚呼哀哉乃作誄曰

禹錫玄珪實曰文命克明克聖光啓夏政其在于漢邁勲惟嬰思弘儒業小大雙名顯祖曜德

收兗及荆父守淮岱治亦有聲英英夫子灼灼  
其儁飛辯擢藻華繁玉振如彼隋和發彩流潤  
如彼錦繪列素點絢人見其表莫測其裏徒謂  
吾生文勝則史心照神交唯我與子且歷少長  
逮觀終始子之承親孝齊閔參子之友悌和如  
瑟琴事君直道與朋信心雖實唱高猶賞爾音  
弱冠厲翼初儀初升公弓旣招皇輿乃徵內贊  
兩宮外宰黎蒸惠節允著清風載興泱彼樂都  
寵子惟王設官建輔妙簡邦良用取喉舌相爾



南陽惠訓不倦視人如傷乃眷北顧辭祿延熹  
余亦偃息無事明時疇昔之游二紀于茲班白  
携手何歡如之居吾語汝衆實勝寡人惡儻異  
俗疵文雅執戟疲楊長沙投賈無謂爾高恥居  
物下子乃洗然變色易容慨然嘆曰道固不同  
爲仁由已匪我求蒙誰毀誰譽何去何從莫涅  
匪緇莫磨匪磷子獨正色居屈志申雖不爾以  
猶致其身獻替盡規媚茲一人讜言忠謀世祖  
是嘉將僕儲皇奉轡承華先朝末命聖烈顯加

入侍帝闈出光厥家我聞積善神降之吉宜享  
遐紀長保天秩如何斯人而有斯疾曾未知命  
中年隕卒嗚呼哀哉惟爾之存匪爵而貴其食  
美服重珍兼味臨終遺誓永錫爾類歛以時襲  
殯不簡噐誰能拔俗生盡其養孰是養生而薄  
其葬淵哉若人縱心條暢傑操明達困而彌亮  
軀輅旣祖容體長歸存亡永訣逝者不追望子  
舊車覽爾遺衣幅扣失聲遙涕交揮非子爲慟  
吾慟爲誰嗚呼哀哉日往月來暑退寒襲零露

霑凝勁風淒急慘爾其傷念我良執適于素館  
撫孤相泣前思未弭後感仍集積悲滿懷逝矣  
安及嗚呼哀哉

遺事

山壽啓事云太子舍人夏侯湛有盛才而不長  
治民有盜臺閣在東宮已久今殿中郎缺宜得  
才學不審其可參此選否也

夏侯湛著魏書見陳壽所作便壞已書而罷

是書見之爲南陽爲范蠡立廟

水經註

集評

夏侯孝若其體面皆微

文心  
雕龍

夏侯常侍集



附錄